

TEKS UCAPAN PERASMIAN

**YB DATO SRI ALEXANDER NANTA LINGGI
MENTERI KERJA RAYA MALAYSIA**

**MAJLIS PENGANUGERAHAN & PENCAPAIAN CEMERLANG
QLASSIC, SHASSIC & MyCREST 2023**

**WORLD TRADE CENTRE KUALA LUMPUR
19 SEPTEMBER 2023**

(SALUTASI AKAN DISEDIAKAN OLEH PENGANJUR)

Para tetamu yang dihormati,
Pemimpin industri,
Wakil-wakil media,
Tuan-tuan dan puan-puan sekalian,

Salam Sejahtera dan Salam Malaysia MADANI.

1. Saya amat berbesar hati kerana berpeluang untuk bersama-sama para hadirin sekalian bagi meraikan Hari SHEQ iaitu *Safety & Health, Environment and Quality* bagi tahun 2023 anjuran Lembaga Pembangunan Industri Pembinaan Malaysia -CIDB.

SHEQ selari dengan prinsip Malaysia MADANI

2. Seiring dengan berkumpulnya kita di sini untuk meraikan pencapaian syarikat dan individu yang bekerja keras dan menunjukkan komitmen mereka terhadap kualiti, keselamatan, dan kelestarian, izinkan saya mulakan dengan menyentuh sedikit prinsip-prinsip Malaysia MADANI.

3. Prinsip-prinsip utama MADANI termasuklah mempromosikan keadilan sosial, memastikan tata kelola dan tadbir urus yang baik, menegakkan prinsip ketertiban undang-undang, melindungi hak asasi manusia, dan memupuk pertumbuhan ekonomi serta kelestarian. Di dalam hamparan konsep tersebut, di mana inklusiviti, kelestarian, dan kecemerlangan bertaut rapat, kita memberi penghormatan kepada mereka yang telah mencapai kecemerlangan di dalam bidang Kualiti, Keselamatan, dan Kelestarian. Pengiktirafan ini adalah bukti komitmen kita yang padu untuk membina bukan sahaja struktur, tetapi juga masa depan yang teguh dengan prinsip-prinsip ini sebagai terasnya.

4. Jadi, syabas! saya ucapkan kepada CIDB kerana terus komited menganjurkan Majlis Penganugerahan & Pencapaian Cemerlang QLASSIC, SHASSIC & MyCREST 2023.

5. Tentunya majlis seumpama ini amat penting bagi memotivasi dan memupuk semangat di kalangan para pemain industri pembinaan di Malaysia dalam pelbagai aspek seperti mendorong penilaian kualiti, keselamatan dan kemampunan alam sekitar, menggalakkan persaingan sihat, mengukuhkan kepimpinan Malaysia dalam pembinaan mampan dan melindungi pengguna akhir dan pemilik rumah.

Pengiktirafan QLASSIC, SHASSIC dan MYCREST

Tuan-tuan dan puan-puan,

6. Ingin saya ingatkan di sini, penilaian QLASSIC dan SHASSIC telah diiktiraf di dalam Dasar Pembinaan Negara 2030:

7. Program QLASSIC juga telah digariskan sebagai satu penilaian wajib bagi kesemua projek perumahan awam dan swasta melalui Dasar Perumahan Negara (DPN) yang dikeluarkan oleh Kementerian Perumahan dan Kerajaan Tempatan (KPKT). Dasar Perumahan Mampu Milik (DRMM) yang dikeluarkan oleh kementerian yang sama juga telah mewajibkan penilaian QLASSIC dilakukan ke atas semua Projek Perumahan Mampu Milik di seluruh negara.

8. CIDB juga telah memperkenalkan skim penarafan kemampuan pembinaan iaitu MyCREST bagi penilaian bangunan dan *Sustainable INFRASTAR* bagi penilaian infrastruktur.

9. Keseluruhan program-program ini menyasarkan kepada penyediaan bangunan, kediaman dan infrastruktur yang berkualiti dan dalam masa yang sama memastikan keselamatan dan kesihatan, serta menjaga kelestarian dan kemampuan persekitaran negara.

STATISTIK TERKINI

Para hadirin sekalian,

10. Saya merasa bangga untuk menyampaikan statistik terkini penilaian QLASSIC, SHASSIC dan MyCREST.

11. Sejak 2016 hingga 2022, sebanyak **2,198 projek** telah dinilai menggunakan QLASSIC, kebanyakannya terdiri daripada projek swasta iaitu sebanyak 1,846, manakala 360 projek pula adalah projek kerajaan. Daripada jumlah tersebut, 84 projek telah berjaya mendapat markah antara 85-100%.

12. Untuk tahun 2022, markah purata penilaian QLASSIC telah meningkat berbanding tahun 2021, iaitu daripada 73% kepada 76%, manakala markah tertinggi sehingga tahun 2022 adalah 90 peratus. Syabas saya ucapkan ke atas peningkatan ini.

13. Disebabkan peningkatan markah QLASSIC dari tahun ke setahun, CIDB telah menetapkan hanya projek yang menerima markah 85% dan ke atas sahaja yang akan menerima anugerah pengiktirafan QLASSIC bermula tahun 2019. Pada tahun 2022 sebanyak 254 projek telah memohon untuk membuat penilaian QLASSIC. Pada hari ini sebanyak 15 syarikat kontraktor dan pemaju akan menerima pengiktirafan untuk 16 projek pembinaan bangunan yang telah dinilai pada tahun 2022. Tahniah kepada projek yang cemerlang!

14. Bagi penilaian SHASSIC pula, sejak 2016 hingga 2022, sebanyak 1,200 projek telah dinilai iaitu 946 projek swasta dan 254 projek kerajaan. Pada tahun 2022, sebanyak 107 projek telah dinilai dan hari ini sebanyak 11 projek akan menerima pengiktirafan kecemerlangan SHASSIC

melibatkan 9 syarikat kontraktor dan 10 pemaju. Tahniah kepada projek yang berjaya!

15. Pasca covid-19 menjadi cabaran yang besar kepada industri pembinaan, apatah lagi bagi meneruskan agenda pembinaan mampan. Namun, dalam mendepani cabaran tersebut, sebanyak 30 penilaian MyCREST dan Sustainable INFRASTAR telah dijalankan dengan lebih 50 permohonan telah diterima. Melalui kedua-dua program ini, kita telah berjaya melahirkan 600 fasilitator bagi MyCREST dan 163 fasilitator Sustainable INFRASTAR yang mana mereka ini adalah dikalangan pemain industri yang telah dilengkapi dengan pengetahuan pembinaan mampan bagi menyokong kedua-dua skim penarafan. Tahniah dan terima kasih kami ucapkan atas sokong dan kerja kuat industri. Pada hari ini, kita akan mengangkat pencapaian yang terbaik bagi projek yang berjaya mencapai sekurang-kurangnya tiga (3) bintang dan ke atas.

16. Setinggi-tinggi tahniah saya ucapkan kepada semua penggiat industri pembinaan yang bakal menerima pengiktirafan kecemerlangan untuk pencapaian QLASSIC, SHASSIC dan MyCREST .

Penutup

Para tetamu majlis yang saya hormati sekalian,

17. Pencapaian yang membanggakan dalam penilaian QLASSIC, SHASSIC dan MyCREST ini menunjukkan bahawa penggiat industri di negara kita berupaya melaksanakan projek-projek pembinaan dengan menitik beratkan kualiti hasil kerja, kelestarian alam sekitar dan

memastikan semua garis panduan kesihatan dan keselamatan di tapak bina dipatuhi.

18. Melihat kepada perkembangan industri pembinaan yang terus cemerlang dalam keempat-empat penilaian yang disebutkan tadi, oleh yang demikian, sukacita saya mengumumkan satu lagi anugerah tambahan yang kita bakal sediakan pada tahun 2024 iaitu **Anugerah Supreme SHEQ**. Anugerah ini akan dikhaskan kepada projek yang berjaya menjalankan ketiga-tiga penarafan – Kualiti, Keselamatan dan Kesihatan, serta Kemampanan - pada markah penilaian yang tinggi. Saya berharap agar lebih ramai lagi penggiat industri mengikuti program-program ini dan sama-sama berjaya bagi merealisasikan impian kita untuk meletakkan industri pembinaan dan pembangunan Malaysia di pentas global.

19. Sebelum saya mengakhiri ucapan, bersama-samalah kita memberikan komitmen untuk melangkau batasan, berinovasi tanpa henti, dan meningkatkan standard negara kita ke tahap yang lebih tinggi.

20. Dengan ini, saya dengan sukacitanya merasmikan Hari SHEQ 2023.

Sekian, terima kasih.